

四庫全書

集部

欽定四庫全書

文端集卷三十三

大學士張英撰

篤素堂詩集四

山居幽事戲擬右丞體三十首

居傍幽巘石屋四面青蒼削成纔見峰腰雨過忽看松
頂雲生

近對層巒飛瀑匹練高懸翠微空谷涼風乍起滿林烟

雨霏霏

日暝波平鷗泛谿清沙白魚遊一葉隨風上下桃花流水扁舟

近柳依松小閣下臨千頃湖平卵色青天雪淨魚鱗細浪風輕

四月園林笋茁村翁未覺寒酸十日蒼龍解籜頓添碧玉千竿

別有幽人鼓吹桔槔聲轉清渠烟外歌隨秧馬柳邊鐸

響柴車

秋淺栗房未老花稀蓮子初垂挹取荷盤曉露煮來香
沁心脾

赤腳婢能執爨蒼頭僕解耘田水碓自舂香稻魚梁偶
得谿鮮

香雪深藏梅隴一林寒蕊開遲客夢不離西嶽春風先

到南枝

香雪草
堂名

樊圃濃霑曉露屐痕謹避新蔬採摘頻扶豆架滿攜自

執衣裾

靜對松間綠綺琅然字字清圓乍覺松風吹去此聲不

在徽絃

嶺上寒松天際喬柯天矯披離一面迎風凝去聲雪玉龍

千尺尤奇

春暮千山染綠無邊香氣吹溫幾樹桃花似錦柴門蝶

鬧蜂喧

最是秋容顰艷楓顏杳紫雲鋪錦幄龍綃十里人間別

有清都

曲徑潛過深綠小亭盡繞修篁不用頻搖團扇陰濃地
溼偏涼

此地泉甘土沃人稀市遠無譁黃鳥啼殘柳絮白鷗睡
穩蘋花

疏瀾雙谿繞屋蘭橈桂楫新成曲曲皆堪小駐芙蓉百
丈花城

歷過鯨波千頃占取龍眠一峰曾記東坡好句白首新

栽萬松

醅荅花時酒盞遣驅愁緒詩瓢把卷看松白晝焚香聽
雨深宵

身世啓期三樂景物春秋二分花落一簾紅雨稻香十
畝黃雲

高下林間石磴蕙蘭手種千叢香氣氤氲巘谷花時跌
坐其中

雪斷堦前履跡茅檐低接疏梅梢杳煨香滿屋新得隣

家芋魁

結構小亭洲渚四圍徧植新柯一擢綠谿深入梨花低
映春波

磊塊全消胃次憂煩不挂眉端甘脆芥松霜味清芬杞
菊朝餐

小樓高峙林杪面面窗扉洞開嵐翠雲中涌出雪濤天
際飛來

湖畔先疇二頃弟兄老學躬耕笠澤挂帆春雨洞庭橫

笛秋聲

竹隲鴉催蚤起
蘇塔鶴伴閒行
底事花陰佇立
兒孫小閣書聲

愛看一犁春雨
家家盡力農桑
黃犢烏犍俱雅
綠蓑青笠皆香

春半杏花司令
輕烟細雨佳時
自是神僊豐艷
粉腮微透胭脂

石磴遙通水榭
小橋近接筠廊
垂柳裊娜波面
藕花千

承銀塘

嚴寒自遣

嚴寒小閣掩書窗坐擁珍裘舊驢驢藉釋冰花烘煖硯
自澆梅蕊試溫湯茗香澹泊消長夜妻子團圞話故鄉
我本疎慵粗解事六街風雪看人忙

夜坐

北風號庭槐聲撼紙窗急小舟蘆荻中萬頃波濤立微
疴得小憩譬彼蟲蠖蟄梅花溫室火謹避嚴寒入書卷

亦高閣琴絲且什襲心如澄潭月趺坐數呼吸眼光牛
背上紙帳夜熠熠

和內人

時建蘭
作花

故園芳徑入叢蘭惟有歸田事最難近得乞休消息好
應知喜色上眉端

香滿疏簾玉鏡臺謝家庭畔紫蘭開清吟正對名花發
此際思君日幾回

為內人書扇

謝傳庭前詠雪情
斂華尚樸避才名
孫曾滿眼看三輩
福慧雙修自隔生
紫綉重沾鸞鳳字
青帟不飾珮環聲
佗年鶴髮相莊處
竹徑荷亭景最清

送嚴州太守蔣受祉

黃綬新恩出九重
富春江繞郡城東
一樓畫角丹崖裏
十幅蒲帆翠靄中
竹馬此時迎愛日
羊裘終古振清風
千峰題句今存否
為訪元英與放翁

廷瓚以祭告衡嶽畢還里正值庭梅放時

燕巢營構十年餘自種細梅繞敝廬
湘水人歸霜落後
蕭齋花滿雪霏初
山中春晚園官報隴上香濃驛使書
兄弟巡檐同索笑題牋莫遣信音疎

下直

下直得小憩重雲欲雪時擁被木繇
暝塞戶蒲簾垂焚
香古銅鴨瀹茗小花瓷江梅十二株
結蕊抱寒枝溫室
火力微使我花信遲蠟燭有奇馥坐
久聞希夷思淺無
傑句聊復成吾詩

暎室中門人贈雜卉二首

溫室垂簾氣蚤融
絳紗弟子餽芳叢
最憐梅萼寒香裏
卻訝桃花朔雪中
素壁夜添孤幹影
冰絃曉映數枝紅
黃柑綠橘青銅鏡
位置聊同六一翁

村落移來紙閣藏
不知鴛瓦有水霜
交枝乍喜花圍坐
繖艷驚看雪照堂
古鼎溫湯勻面粉
地爐新火返氤香
從來不似江南樹
明月清宵影過牆

冬日即事八首

一鑪沉水一甌茶猶覺寒城暮
拆譯老我乍閒情味別
抱琴清夜向梅花

統榻寒葩影自橫
七絃手和若為情
惟慙心腕多塵思
難覓幽泉落磬聲

水僊花發點青莎
但覺瓊林姊妹多
翦燭攤書良夜坐
居然邵子有行窩

狐腋為衾雪一牀
三朝晏起味偏長
小窗嫩日烘簾影
無限春情泥海棠

深護殘香鎮掩關手培寒蕊暫開顏
長安聲伎足豪侈斗室應無如我閒

時逢休沐宜高枕書雜真行續矮牋
要看孤烟紫嶺岫鑪香移近研山前

山妻頌佛禮精幢老我晨寒倒玉缸
埽地焚香清福具况兼花事滿晴窗

兒返江鄉雪正霏小軒瓊蕊映堦墀
到來甫過傳柑節猶是梅花半放時

戊寅正月四日書閣即事二首

隔歲春還解，沍寒名香珍。茗足清歡齒，哀自合思歸。
劇灘急從來，索退難琴按。七絲風月好，花園四壁海天寬。
老妻暫歇縫裳手，相對閒吟話夜閒。

人間萬事重循環，識得應須一解顏。薄有詩篇難免恨，
既叨圭組豈能閒。四時佳卉徵瓶史，數點危峰指硯山。
倚徙歡歌盆樹側，也同邱壑任躋攀。

一室中置寒花十數種，幾無坐處二首

礙履牽衣一室中
深紅淺白列芳叢
盆花位置求安穩
不獨兒嬉笑放翁

交柯接蔭錦成攢
煥室牀前十笏寬
但可一春花事足
從來容膝易為安

再疊堯峰山字韻詩六首

生涯晚歲卷書間
怕聽車聲酷愛閒
但得梅花香裏坐
閉門何地不空山

茅菴窈窕白雲間
藥插漁竿廿載閒
歎息人生何處老

水流花落是家山

地鑪煨火小窗間
催迫桃花不放閒
爭似春烟春雨後
含情含態夕陽山

總是塵勞塞兩間
何人肯放此身閒
惟餘老子癡頑性
隱几時猶夢故山

樵路烟村杳靄間
松陰十畝可閒閒
芙蓉露落臙脂港
躑躅花開錦繡山

六街燈火五雲間
笙管撩人苦未閒
老我深宵對香雪

兒來聽話舊谿山

紙閣

紙閣蒲簾樂事賒探春梅萼兩行斜居然香雪園中叟
日日牀前埽落花

自題圃翁檀笠采梅圖

紫蜀裁衣古夫須製笠寬近家營小圃別墅占幽巖晚
歲情何寄梅花性所歡甌瓶一枝雪常共爾清寒

前歲種蕙草盆中今忽作幽蘭五箭

雜蒔羣芳娛老眼
喜看蕙草忽成蘭
離騷九畹分明別
物理遷移欲辨難

曾孫牛郎

閉戶那堪過社日
弄琴聊與送梅花
茗香之外無多事
持挹曾孫一笑譁

春半

太液冰開綠漸勻
杏烟輕籠

帝城春燕來絮語
如歸客花落愁懷
似別人鄉夢有時

吟短句遊蹤無地蹋香塵祇今松嶺樵歌路迴望隣家
木筆新

所願

稱身輕絮葛傍宅小園池弄水度朝暮看花紀歲時破
閒聊展卷適意偶成詩茗餌餘生足鳴琴理釣絲

清明二首

閒門插柳柳絲輕忽聽兒童笑語聲澹染麴塵纔有色
看來未省是清明

春風先入紫泉宮地濕林暄氣蚤融昨日園官報行在

山桃遠寄一枝紅時

駕在五臺將歸園折山桃一枝寄行在報
御園春色

清明後二日西郊書觸目二首

御園烟柳綠初勻韋杜城南別作春澤澤土膏移樹日
涓涓泉脉灌花人錦韉細馬紛馳道畫轂香車動軟塵
差覺故園風物蚤滿枝紅雨正芳晨

逶迤官道井幹邊借得農家屋數椽平楚乍看開曙色

遠林微覺動春煙
暎蜂蝶鶯猶溢時
過清明柳尚眠
檢點吾生多幸事
獨傷容易擲流年

寄廷玉二首

馳書頻與報山阿
為我殷勤護舊柯
喬木數株非易得
新花百種未嫌多

曲折長廊可隔塵
花籬編葺藉霜筠
不須紅紫堆三徑
但滿清陰便可人

擬放翁閒中富貴

酣眠飽食任從容憂患危疑百不逢曲徑蕭疎穿萬竹
小樓蒼翠壓千峰蜂喧桃李衡門暝鷺宿芙蓉鏡水溶
散髮浩歌天壤內端知不愛酒泉封

蚤起之西郊

投枕近來增懶慢趨朝未許遂疏慵檐前斜挂昏黃月
烟際遙開斷續鐘嚙語婢貪春睡重遲鳴鷄怯曉霜濃
關千北斗低垂地無數輪蹄陌上逢

廷瓚新購北園賦此

吾鄉北郭枕幽巖新購園林十畝寬
曲沼波光浮檻入層巖石色倚闌看
長松圍屋將百挺好竹綠谿卻萬竿
佗日扁舟載茶具栽花弄水足盤桓

讀放翁詩偶成四首

石帆山下禹祠邊醉叟嗟峨二十年
健筆高懷逢勝地盡搜清景入詩篇

遺編近代始流行照乘珠光萬斛傾
人在海山端不死水沉一炷苔毛生

輓強沃羽本天才暇練詩篇老不衰夜夜神光生帳底
固應奇句逼人來

愛玉敲金字字妍丹青畫出閨風僊樂天七十詩懷減
輸卻龜堂十五年

四月郊居二首

郊居端不負芳晨滿眼平蕪柳色新近欲移房傍僧舍
海棠雙樹苦留人

葉密何須錦成幄月明不藉玉為缸路人指點予栖處

一樹梨花映紙窗

送八弟之官咸陽二首

鴈序初銜一紙書
老親暮齒見懸弧
間關南北分棠影
家世清貧少木奴
薄祿一官多荏苒
征塵十載總崎嶇
終南黛色華林樹
沃野秦封豈盡蕪

晴郊驪唱別青門
遠度函關憶弟筵
日落西風吹渭水
雨餘春草徧咸原
新豐舊店山川古
漢代遺民里社存
屈首微官師柳下
循良冀爾蚤飛騫

題陳廣陵扈從北征圖八首

書生遙控鐵連錢，隊入黃沙萬幕烟。
卻笑龍門誇縱覽，止從域內見山川。

絕徼纖塵迅掃除，羶裘君長拜穹廬。

聖人神武清沙漠，才子高吟在屬車。

鄒枚筆札奉傳宣，金鳳時分五色牋。
撰就銑歌天上曲，夜深待奏幔城邊。

六軍萬騎陣雲屯，豹尾清班不動塵。
盧橘江南傳塞外，

旌門拜

賜及儒臣

夢入烏孫天外磧
手捫青塚路傍碑
龍沙柳色榆關月
親見唐人出塞詩

明駝寶馬翠雲裘
羽箭雕弓賦壯遊
謾道詞臣無武畧
佗時孫子羨兜鍪

春風三月歷秦關
豹袖貂褕往復還
京洛黃鶯啼柳絮
雪花如掌是天山

鵷鵬健翮氣摩空鷁鷁隨飛度朔風

時廷瓚亦同扈從

為恃

深恩忘遠別翠華黃幄紫雲中

題王石谷騎牛還山圖

石谷山翁舊隱淪京華遊跡動楓宸漢書一卷歸吳苑
挂角於今見古人

西郊漫興三首

睡殘過午日偏長款段閑憑一徜徉聞有鄭花開數畝
畏吾邨畔小南莊

家家紅藥滿畦栽
土屋芭籬一半開
偏我看花逢驟雨
風恬日澹不曾來

滄波弱水本難求
井谷蹄涔亦少休
便是唐人小三昧
四隣新綠一園收

題房師總憲蔣公趨朝圖

威鳳在朝陽
攬輝聽暗甍
雖囀廊登國
珍光氣仰璜
琮吾師社稷器
岳瀆生鉅公
大賢應昌期
萬類資帡幪
蚤年盛文譽
言陟蓬萊峰
天衢四十載
事業夔與龍
持憲肅

百度精白殫寅恭網紀佐清宴元氣日龐鴻鳴珂紫霄
上垂紳清露中舉朝多後進敦碩推宗工幸生桃李蹊
長養藉春風恒陪玉階躅泰岱瞻儀容

六月九日移榻郊外

暑雨氣蒸溽城市探湯如

聖詞降溫藹涼爽來郊居樹色洗濃綠葛衣上籃輿草
露未全晞呼吸皆清虛柳下款舊扉老圃正揮鋤禾麥
過牆青瓜蔓走堦除埽地焚蒼术鋪粥烹新蔬蟬吟晚

嘒嘒蝶夢午徐徐飽食復酣眠生事欣有餘但許長高
枕何必非吾廬

歐陽文忠與韓子蒼約五十八致仕踰期七年而
後踐言寄以詩人事從來無定處世途多故踐
言難誰知潁水閒居士十頃西湖一釣竿和之

曰

樂天未老公同去嗣後高人接踵難踐諾斷然先永叔
芙蓉谿畔一漁竿

題梅淵公畫冊三首

物外人宜放眼寬
一楓一栗足盤桓
小亭望裏無多景
秋水平湖鴨嘴灘

攢峰疊岫入烟鬟
李杜相逢飯顆山
澹墨寫來空翠滴
矮箋何意見荆關

筆端何處著纖塵
絕壑幽巘足鬼神
貽我黃山松百尺
祇今常憶敬亭人

郊外雜詩四首

曾經宿處認柴門
流水潺潺繞斷垣
幾樹胡桃遮矮屋
米家畫裏雨中村

遙聞鐘漏隔華清
卻掩殘書對短檠
樹暗荒園深夜雨
寂寥能使道心生

雨餘涼月傍林明
觸我空山靜夜情
稍覺未忘塵世處
微嫌牆角度車聲

西山雨過亂雲飛
擗葉吟風暑氣微
返照斜臨禾黍外
一川蒼翠上人衣

題畫

風恬日暝物華新
樹色嵐光正暮春
柳絮香飛啼鳥路
桃花紅映蕩舟人
枳籬芳徑多閒客
茅屋青山遠世塵
自是昇平饒樂事
歌衢擊壤盡堯民

戊寅夏日郊居浹旬四郎廷璫以養疴城中不能
從書此十首與之

承

詔傳溫語追涼郭外風
借居青樾館卻傍紫泉宮
榆柳

千村暗蓬蒿一徑通經旬宣喚少吟卧綠陰中

西郊今鄆杜谿水獨潺湲石瀨新荷浦泉源古枯邨引
流先奉御分派各為園處處芳蓀遶餘波亦

聖恩

斷垣苔蘚綠樊圃稱幽栖柿葉當窗密瓜藤映戶低雷
聲殷樹北雨腳過庭西微覺驚殘夢黃昏度馬蹄

平生憚拘束瀟灑愛園居但有林為徑何妨草結廬心
同黃鳥樂意向綠陰舒晚食甘葵藿斜陽看種蔬

向夕微涼動宜人，理素琴平沙含古意。
流水識鄉心，幽籟生松壑。清風過竹林，疎牖近書帙。
聊此託長吟。

桃笙卧復起，庭樹影交加。清露開簾重，明河帶月斜。
寒蟹銚下語，茉莉枕邊花。莫漫高吟歎，中林有宿鴉。

睡起過亭午，閒吟白日斜。蟬聲千樹柳，鳳羽一叢花。
野客遺紅藕，隣僧饋紫茄。身心安穩處，幽事亦堪誇。

叔度來東郡，相過避暑時。夢同風雨夕，話盡海山奇。
竹榻閒搜帙，花陰靜覆棋。佗年浮渡約，江路有前期。

時即
墨黃

元美
來訪

雲氣橫西嶺峰峰入窅冥郊原經雨足禾稼接山青白
水分畦看寒泉汲井聽漸知秋色近花底見流螢
華藏何年寺松陰白日寒平生貪種樹難得一株看皓
質凌霜雪清音比鳳鸞風塵欣覩此莫訝久盤桓

同元美過法華寺

園居苦炎蒸駕言適招提村過槐柳側路入禾黍西老
僧坐井欄童子方灌畦為我摘新蔬炊菰復糝藜移牀

入深松地溼林影低殿前鴨腳樹高與雲峰齊白松有
奇姿膚香如柔荑竟日飲空翠使我野性迷不覺曦陽
度但聞蟋蟀啼惋惜日中去未及林鴉栖

避暑信宿法華寺四首

酷烈今年暑殊非老所堪幸能辭襌襪暫許伴瞿曇古
屋青蘿徑深林翠葆菴竹風荷露好斯際憶江南

當晝困炎暑雲峰矗目長忽聞庭樹響頓覺客衣涼蝶
亂風翻草鴉驚雨過牆天工真老手搏掬等尋常

蘚堦延晚步蓮室愛西偏蟬噪喧逾寂松陰老更妍微
涼三伏雨空翠一林烟未遂麝麝性吾生意惘然

畏吾邨畔寺中有牡丹枝珠顆榴房坼霜林柿蒂垂瓜
疏留客美泉圃寄花宜十載歸田思唯應老衲知

予嘗
寓花

于僧
圃

文端集卷三十三

欽定四庫全書

文端集卷三十四

大學士張英撰

篤素堂詩集五

白鹿

呦呦山鹿本僊姿
瑤島分輝物色奇
月皎細尋眠石處
雪深難辨入林時
芝銜五采身偏淡
玉琢雙麕影共隨
瑞應由來徵孝德
同遊鶴禁有光儀

園居

圃事吾麤習相看情易親
園丁三伏苦菜甲四時新
插架瓜藤直分畦水澤勻
寒菹稀更好采摘不嫌頻

小憩

草徑園三畝烟村樹幾行
窗間閒帙滿花底素琴張
暑退睡方好泉新茗益香
古今難適意小憩便清狂

讀東坡耕種詩有作

子瞻謫黃州終窶艱金禹力耕
求寸壤不敢厭境墉荷

耒耜來東坡乘春自墾闢荒塗翦荆榛枯井搜瓦石好雨
渡江來頓使土膏澤先生善言農夙本農家客綠穠鋪
秧青棋局分畦白夕上露珠圓晴飈風葉碧留連移我
情置身在疆場古來賢達人遭逢多困厄老以東坡名
永言志疇昔誰知千載後聲稱常嘖嘖

戲擬放翁四首

陶令情懷亦愛廬況兼碧嶽統清渠細春香稻珠難比
解穽新萌玉不如簾外花枝留語鳥水中山影襯遊魚

長吟高卧真成懶
亂疊鳴琴與素書

萬疊青山一水橫
宜來此地學躬耕
谿花盡向堦前轉
雲葉多從棟裏生
秔稻年年觀穫樂
子孫世世讀書聲
令威千載人間語
竹鵲松坪尚有情

碧繞釣磯新漲色
綠侵書幌古苔斑
堦前依柱多生竹
枕上推窗即見山
詩思斜陽高柳下
琴聲流水古松間
茗香盡日無人到
自昔應無如此間

公麟舊跡久微茫
新壓河流結草堂
紫翠山烟迷鳥道

碧空雲影動谿光閒中盡味琴書樂蚤起貪聞草樹香
莫道總無人跡到樵歌歸路意何長

讀放翁詩有作

我讀放翁詩為翁紀歲年石帆山下釣魚船水滿江湖
詩滿天高吟禹會窆亭前醉倒秦皇酒甕邊一字一句
清且妍翠屏千丈落紅泉歲開九帙方翩翩騎驢蹋歌
邨市眠蛇年秋風梁木顛作詩四百七十有餘篇樅金
憂玉猶鏗然茲事古今誰比肩頻首稱曰詩中僊

暑中自適

溽暑不成寐，盥漱拂晨起。初陽射東林，林間日華紫。
邱舍闢軒窗，移牀綠陰裏。園茗發陳香，井花汲新水。
隨意抽書帙，信手弄宮徵。聽蟬過柳枝，看蝶抱花蕊。
綵衣午還卸，豆粥晚偏美。我本入世人，觸暑分應爾。
經旬少公事，暫許謝塵滓。陌上垂鞭客，隴畔荷耒子。
視余俯仰情，所獲良獨侈。詩成一再詠，涼颼滿窗紙。

遠望

遠望起墟烟閒行看汲泉雷聲飛鳥外雨足夕陽邊
暝色催歸騎涼颼歇暮蟬但將清興往隨處得幽偏

卻暑

延爽苦無地卻暑在忘機靜坐展紈扇涼風生葛衣
游心深竹磻結想古苔磯萬木蕭蕭下清泉落翠微

聽道上鈴聲

賁送封章一騎塵牆西輦道是通津鈴聲陌上無時歇
老盡人間名利人

秋雨

秋雨驅殘暑園居客思迷地如蒼蘚滑林溼綠陰低聒
喜聽蟬歇閒容伴燕栖焚香歌枕處未覺景淒淒

與彈琴道士曹天全

花時蹋破紫苔物外幽人數往還腕下泠泠寒礪水
月明常聽古松間

不獨閒心付七弦辭家出世合求仙前生應是王喬輩
熟讀黃庭正少年

偶作

東西路自嶺頭分
日落歸樵隔水聞
差可引流還種樹
尚慙抱犢與梯雲
近移密竹巢鳩婦
遠作平沙引鷺羣
為愛明時歸校晚
不辭人誦北山文

即事

閱盡人間角逐場
老懷惟覺便農莊
摘來豆莢羹湯美
糝借荷花餅餌香

高人共有名山願
七事難兼李習之
話到芙蓉溪上路

略無餘憾復何疑

憶山溪

一葉輕舟泛木蘭
隨風流過落花灘
人間何地無谿水
難得千峰落影看

暑中讀錢考功山中諸詩

節過新秋暑益奇
渾無風動綠楊絲
欲抽書帙消長日
賴有錢郎清婉詩

題孫式如

賜扇

素簾湘筠巧製裁
花陰半展月輪開
涼颼不是尋常爽
分得清風

鶴禁來

扁舟

一水千松照落霞
晚風徐引釣絲斜
何人得似扁舟客
岼繞芙蓉萬朶花

暑中

盡日密林蟬叫暑忽聞高樹亦吟風
荒庭雨過琴絲緩
萬籟盈虛一氣中

暑中過法華寺

頻過蘭若覺幽清
老衲茶瓜世外情
風透葛衣消暑氣
濤翻松籟作秋聲
餐分齋鉢神偏爽
息數僧牀體倍輕
亭午氤氲成小憩
夢中猶繞豆花行

又

繞砌幽花鎮日開
為依老衲重徘徊
上書若遂歸休志

相訂禪關一宿來

枝幹扶疎色莽蒼
挈雲老樹發新香
佗時暗數曾遊處
殿角霜松不可忘

禾稼新秋雨復晴
籃輿白葛晚涼行
清谿曲抱城西路
高柳長堤似掌平

戊寅中秋

秋來景物更誰同
置我清陰翠靄中
桂露夕溥穿樹月
蘭香朝撲捲簾風
琴含宮徵閒逾好
詩繼陶韋落益工

蔬食何妨坐良夜八關聊擬樂天翁

高梁溪上行

高梁橋北舍車行十里新堤輦道平夾岼柳翻溪影動
連朝霜落水痕清聊同濠濮邱中想小憩滄浪物外情
安得扁舟南澗曲枕蓑歌櫂釣絲輕

寄木屋八十生日

千尺松喬倚赤城江天南望若為情喜看碩果留丹嶂
賴有靈光矗太清報答平生應大耋折除官爵是才名

漫言人是邱園客百卷文章已盛行

皆響亭邊列嶂懸一觴一詠即飛僊松風高躅陶弘景
耆舊新詩孟浩然題徧小橋三徑竹花圍別墅一谿烟
楷模後輩誰能似名噪騷壇七十年

少宗伯韓慕廬蒙

賜御書篤志經學匾額恭題于後

大雅荆榛誰埽闢常洲韓子獨窮經高才跌宕傾流輩
健筆清疎寫性靈激賞自應承紫綉寵頒曾見出青冥

玉堂飛白同千古室有榮光炳日星

題畫

初春山色蔚藍烟纔見涓涓雨後泉欲試單衣相稱否
誰家亭子杏花邊

立春前一日

匡牀戢影倦輪蹄枝比鷓鴣得穩栖盧橘雙懸書幌北
緗梅叢發硯山西茶烹活火吹魚眼爐剩餘香煮麝臍
明日故園春信蚤詠花軒畔酒堪攜

董華亭書清福吟因其意而廣之得三百字

試語世間人何者為清福我有一頃田乃在北山麓峰
攢紫翠殷路逶幽潭曲陽坡景物鮮平疇土膏沃清流
貫其中波紋淨如穀逶迤桃岼紅環抱松堤綠高敞杏
烟亭杳靄梅花屋傍砌一池蓮沿籬萬竿竹奇石卧幽
花古藤挂喬木門徑接陂橋庭軒稱涼燠風月四時佳
鶯花終歲續中有白髮翁蕭然常野服閒情託魚鳥忘
機友麋鹿焚香坐清晝扶策縱遐矚目不離煙霞手自

藝蘭菊魴鯉一竿取杭稻八口足雞豚法王政場圃倣
幽俗誦讀課兒孫耕耘問童僕曉林鴉喚起晚窗鶴同
宿祠古四先生陶白與蘇陸松籟雜琴聲花飛亂枰局
有時泛扁舟枕籍書一束船尾挂酒壺餽釘羅果藪蕩
漾隨春風鷗鷺行相逐駐櫂芙蓉灣繫艇篋當渙劃然
發長嘯幽響振崑谷手拍洪崖肩高踵王喬躅耳不聞
喧囂心不驚寵辱樂且不自知憂從何處觸倘肯從吾
游焉敢矢弗告

小寒日梅放一枝

百計求閒苦太癡
爛柯聊且坐觀棋
麝臍香映琴三疊
鹿角霜濃酒一卮
溫室簾開新月夜
瓦盆梅發小寒時
冥鴻斥鷃無窮事
一任天公更不疑

題友人姬侍圖

猶見當年顧虎頭
子安瀟灑水亭幽
金鋪特典圖書地
玉砌高吟殿閣秋
惟見趨陪霄漢側
豈容閒入燕鶯儔
何妨寫出嬋娟想
宗炳溪山本卧遊

己卯元日夢奇石幽泉之勝五更不寐賦此

夢裏茅菴景最幽荒山僻徑小林邱屯雲怪石當軒倚
濺雪飛泉繞樹流蒼蘚間堦逢老衲盤渦深澗見文儵
山童捧出桃如菰髣髴西渠與共遊

小室梅花自冬徂春未謝

小窗臘近火頻催綠萼仙姿繞坐開看過天街鎧火夜
春分猶有未殘梅

題花溪石漾圖為查子聲山

桃花灼灼開春烟含露綽約清溪邊石漾風景幽且妍
菰蒲曲曲堪延緣翰林舊宅倚長川竹籬掩映茅數椽
松陰丙舍同一灣讀書垂釣盤渦間秋水神骨冰霜顏
漁者豈必非神仙握管方在彤雲顛此景安能來眼前
我亦雙溪營小園芙蓉島艤木蘭船種桃蒔竹已十年
水際松梢纔覆肩榆柳徑入秔稻田深山鷗鷺忘其天
欲往從之阻間闕坐對斯圖神惘然

三月十日夜夢

月露輕寒夕吾親入夢遙青山掩謝屐碧水泛吳船草
溼沙間露花明柳外橋陶家循壑意未勝此飄飄

春晚登白塔山

瑤華傳往古石徑入丹梯岼柳籠煙密山桃過雨齊橋
迴新漲迴閣亞偃松低莫訝頻來熟吾家太液西

三月十八日昇山田子治具從高梁橋沿溪遊近

郊諸寺

西郊晴日曉寒輕卸卻籃輿傍水行翠陌烟波新柳色

板橋風雨舊溪聲鶯花偶遂芳時約松檜猶含太古情
勝友提樽淹夕照等閒心跡喜雙清

初夏

千山濃淡綠參差夏淺春深景一奇溪上垂竿飛絮裏
林間燒筍落花時青秧待雨憐鳩婦朱果臨風惱雀兒
領略暄和閒歲月市朝山澤幾人知

鳳梨

鳳梨珍果出南荒昔未標名紀職方班剝錦苞含脆質

續紛翠羽護清香提封遠在波臣外修貢遇知驛路長
總是

皇仁同絕域海邦風味入梯航

遊仙詩

秋月映寒潭皎皎含清虛不可謂之有焉可謂之無古
仙凌鶴背來往紫雲衢吹笛過洞庭鳴珂謁天都千年
不火食蘭露芬可茹綽約桃花顏瑩潔冰雪膚塵世謗
仙者蠢蠕何其愚

送徐華隱學士歸里二首

湛深經術重人師，松桂堅貞海鶴姿。
廿載侍臣

恩遇渥，瀕行為寫落花詩。

喜聆天語自丹霄，宣召還趨鶴禁遙。
拜賜手持金鳳紙，傳餐人過綠楊橋。

己卯中秋後二日積陰始晴，明月在窗，夜永不成。

寐因題憚南田畫鴈來紅二首

籬籊竹下鬪，繇華烏桕丹。楓本一家細，雨疎簾千種色。

始知秋葉勝秋花

芙蓉未放曲江頭
桂露蘭烟已漸收
一片井梧秋色老
獨教錦萸占風流

題王瑁湖下直傳經圖四首

江上秋風桂醕筵
鹿萍當日附名賢
紫雲天際三珠樹
領袖埵麓四十年

畫舸高齋碧樹幽
日斜下直比林邱
金華夙望推都講
經術西清第一流

器量深沉屬大儒
槐庭世業在伊吾
幾人得似河汾席
阿閣文章五鳳雛

長安冠蓋重貂蟬
獨對斯圖意爽然
吾友性耽林壑趣
丰姿散朗似神仙

吾廬十一首

小築吾廬近水涯
望中何處似晴霞
芙蓉溪畔東西岾
裊露含煙數里花

峰峰嵐翠落清流
惟有吾廬景物幽
最愛梅花紫野徑

還宜垂柳繫扁舟

水複山重遶碧疇
吾廬獨占大溪頭
千峰雨霽看新漲
雪浪橫空上小樓

竹隄梅岡往復回
吾廬深隱絕塵埃
稻香亭傍烟邨起
秋水軒臨雪碓開

松堤深瑣綠楊烟
水湛沙明見一川
布穀聲中春似錦
桃花飛落菜花田

筆牀茶竈一舟中
北渚南垞曲澗通
搖過小橋柔櫓歇

蒲帆斜挂芰荷風

楓柏頽紅葉滿枝黃雞啄黍傍柴籬松陰路入秋妍館
正是田家穫稻時

長廊下瞰碧蓮沼小閣正對青蘿峰

放翁夢入
仙居得此

佳夢庭

軒差比似蓬壺端不讓仙蹤

梨雲桃浪影交加烟暝紅蘭徧茁芽我憶艤舟亭畔路
清溪圍繞一邨花

懶慢心情耽水石幽奇蹤跡狎禽魚翠微堆裏三間屋

罨畫溪中十畝居

四序芳菲滿曲欄，不教容易覺春殘。
鶯啼碧樹笙歌院，

花落紅泉錦繡灘。

禹鴻臚為余畫芙蓉島圖，將成景物，有足賦者。亭榭庭廡雖皆意中結構。

邱壑松竹桃杏梅柳之屬，則已具其大槩。遂想高望，遂得斯篇。己卯冬至月中澣。

雙溪詩二十六首

垂雲沱

白沙採樵路，石腳插清渚。
拄杖響莓苔，幽人澹如許。

芙蓉溪亭

溪上芙蓉開湘娥明鏡裏不屑鬪春華儂自宜秋水

南莊

牽牛花滿架秋水綠芊綿要識農家苦門前種秫田

觀穫亭

秧馬似騄駼腰鑣如鴈齒但願禾稼成歲歲常如此

秋妍館

橙黃楓茜紫山澹水澄鮮寄語看山客珍重此秋妍

桂叢

山空秋月白露滴桂叢幽雲際一聲鶴仙人在上頭

來鶴亭

手自種青松龍鱗見其老佗年松樹下不生刺人草

千巘萬壑之樓

舊說龍眠岫桃花滾浪同緣何朝暮景盡入此樓中

傳恭堂

欲識傳恭意無忘結構情柴門觀穫樂紙閣讀書聲

溪光嵐翠亭

溪水滿芳汀臨溪構小亭銜魚雙翠鳥飛去入青冥

雙溪草堂

統砌雙溪合文條聚白沙綠楊千縷樹紅藕四圍花

曲廊

櫻桃綻曉風芍藥含朝露步屨向南榮漸入花深處

垂竿石

本為投竿去臨流一解顏取魚忘著餌常覺釣絲閒

艤舟亭

千尺芙蓉岼雙橈舴艋舟繫舟何處好古柳石橋頭

佳夢軒

淺碧襯殷紅如濯巴川錦山徑儘繁華何用邯鄲枕

梅岡

凍雨溪山路寒香一道斜南岡名玉雪高下盡梅花

蓮渚

溪水東西岼藕花雜紅白中有金鯽魚咬花尾盈尺

綠楊橋

垂柳接長堤
饁餉東菑路
小橋人迹稀
春鶯自來去

稻香亭

曙色滿東畦
扶筇看耘耔
晨光照露顆
芳氣如蘭芷

桃花流水扁舟

畫舫水雲間
白鷗如我閒
前山風雨急
搖入紫菱灣

秋水軒

幽人愛澄澈
開軒對明河
臨水不敢弄
恐浣清淺波

鶴棧

飲啄伴梅花樵青相盼昧本是山澤姿笑爾乘軒輩

松隄

十載松隄樹清陰已漸成不惟樵路隔已解作濤聲

竹圃

瑟瑟青琅玕照我鬚眉綠欲謝大官庖燒笋曾簞谷

放舟亭

高閣綠楊中時來澹蕩風馬知石渠下卻與前溪通

大溪

放開入大溪溪流西復東每當山雨足弄笛水烟中

芙蓉

島雙溪僅有其地而亭池皆未具擬其規模位置應如是為各命以名賦詩二十六首人意所成溪山不得不俯而從之矣屬廷玉按圖味詩以點綴邱壑應不相遠異時對景吟諷斯篇亦可以知予此時之情事耳己卯冬至月廿六日

香山集中有萬事平分衆所知何嘗苦樂不相隨

惟餘耽酒吟詩客但有樂時無苦時因廣其意

得六長句

萬事人間倚伏奇何嘗苦樂不相隨松棚一枕漁樵話

社飲三巡土穀祠石上吹笙邀鶴伴牀頭釀酒待花期
枳籬茅屋園林小但有樂時無苦時

讀史千秋歎奕棋何嘗苦樂不相隨一簾紅雨花初落
三徑烟蘿柳乍垂洗硯春波臨禊帖焚香夜雨和陶詩
浮名不挂閒宵夢但有樂時無苦時

大纛高牙擁路岐何嘗苦樂不相隨千村樹竹迷幽徑
萬壑烟霞護短籬古柳長堤扶杖穩碧蓮小港泛舟宜
清琴伴取閒詩卷但有樂時無苦時

紫綬金魚上赤墀何嘗苦樂不相隨
春烟古樹經時雨
寒食新花滿故枝
手種嘉蔬堪採掇
自疏清澗看漣漪
茫鞭布襪朝乘興
但有樂時無苦時

繡閣羅帷簇粉脂何嘗苦樂不相隨
玉玲瓏

水仙名

本離

塵客萼綠華為絕世姿
一點芳心蘭蕙露
十分春色牡丹枝
垂藤翠幄花茵暝
但有樂時無苦時

吹竹彈絲舞袖垂
何嘗苦樂不相隨
花園紙閣攤書卷
竹覆漁磯引釣絲
芍藥濃香迷粉蝶
梧桐新綠聽黃鸝

一甌茗熟消塵事但有樂時無苦時

小憩

歲晚小休憩寒花塞滿室
緗梅交枝柯朱白影相暱
嫩紅藥翻艷冶緋桃密復有
冰雪姿水仙最清逸香光
動戶牖盆盂礙書帙側身入
芳叢趺坐僅容膝爐火溫
夕薰窗明透冬日老懷無所
歡藉以慰蕭瑟

送姚君山之江西三首

聖代弓旌日見招可憐姚鵠尚飄飆
鋒車一去長安陌

酒客詩人兩寂寥

宦遊三世總冰清無限京華寄廡情
燭照西廊人未寢一簾寒月讀書聲

彭蠡波光動小孤匡山雲氣接香爐
憑君為訪西林寺白傳遺蹤尚有無

除夕友人贈新開芍藥四枝

花繁溫室錦成窠除夕香侵玉
巨羅忽見藥欄開最早小窗明月已清和

庚辰正月十日即事

瑾戶還如作繭同地鑪溫暝得春融香分驛使江南白
色借漁郎洞口紅瓦枕夢遊三島外布簾人蟄百花中
黃柑手掬清芬滿小有心情似牧翁

題虛槎小像

作牧清時有鳳麟豐貂紫綺舊才人冰心鐵骨誰能似
千樹梅花是後身

題曼園小像二首

深樹垂藤緩帶居神仙
羊骨更誰如一編靜對松風裏
端是圮橋石上書

星光熠熠映三階
卻寄閒情碧水厓
仰止吾家公輔器
汪陂千頃對澄懷

送杜宗伯還里

烟霞耆舊返滄州
出處同時第一籌
笠澤魚鮭容晚食
菱湖書畫滿扁舟
雪雖垂領身猶健
年未懸車志已疇
從此穩栖珠樹鶴
神仙長伴季真遊

秋晚即事

寥歷天高鴈度遲滿城砧杵動涼颼悽情庭草花開後
澹蕩秋光病起時桂寄空山尋老衲蘭移溫室屬塲師
故鄉書到重陽近踈菊寒蓉問短籬

上巳

上巳韶華滿近垌暝風吹面氣冥冥花光欲動桃先艷
春色將歸柳最青修禊良辰宜曲水采蘭佳會在芳汀
此時寂寂應難話為憶南溪舊酒亭

寄顏澹園

弟兄名譽擅聲華宣武門邊曲巷斜
白袷每招京洛客素琴雅稱魯儒家
清吟數對高齋酒踈菊新開小苑花
一自為霖向南北廿年消息隔天涯

病起

颯颯秋聲雜暮砧遙憐宋玉此時心
盆蘭鵲鵲花開晚庭樹蕭疎落葉深
節近重陽猶問菊病來十日未鳴琴
且炊白飯圖身健莫與寒蛩鬪苦吟

題翁康飴觀穫圖四首

村落黃雲接壤同
曾孫觀穫指溪東
寬衣博帶丰神古
人在豳風藻繪中

蠶女繰車動晚涼
農夫錢鏹刈秋霜
有田種秫原堪羨
況在清溪古樹傍

絢爛終歸淡泊宜
飽看身世已多時
人間惟有農桑樂
試讀陶家種豆詩

垂紳日日近承明
偏繫田家婦子情
霖雨他時霑渥後

幅巾來聽叱牛聲

文端集卷三十四

欽定四庫全書

文端集卷三十五

大學士張英撰

篤素堂詩集六

辛巳新歲四日

高枕經旬免坐衙
徐看晴日下檐牙
猶餘臘氣盈樽酒
恰對薰鑪繞坐花
撾鼓頗知隣舍樂
賣錫莫厭市兒譁
青梅翠滴楊梅紫
且試江南顧渚茶

紙閣梅花

靜對方知絕世姿，橫斜書幌一枝枝。
根梢磊砢踈偏好，風骨清嚴澹益奇。
紙閣夢迴春淺日，布簾香耐夜寒時。
冰霜歲晚誰能識，千首龜堂贈爾詩。

春深

春深鑪火不須催，溫室初開二番梅。
京國且看花滿屋，鄉園休憶雪成堆。
膠牙徧試盤中果，婪尾徐傾燭下杯。
碧落空騰辭祿疏。

君恩未許重徘徊

小室即事八首

碧玉疎梅影一行
粉紅桃萼倚東牆
分明水照谿堂路
忘卻寒宵客

帝鄉

琴絲挂處礙芳叢
書幌開時點落紅
塞破屋廬無坐地
剪澆人似賣花翁

喧寂閒忙各性宜
繁華未必勝栖遲
放翁九十誰能似

挂杖行遊日有詩

簫鼓如雷結隊來
璣瑜似火錦堂開
幽人坐歎看天壤
綠樹黃鸝酒一杯

高窗暎送初晴日
古鼎香溫淺碧茶
九陌輭紅塵裏客
幾人靜坐對梅花

丹青一束寫幽巖
中有吾家舊考槃
潦倒鄉心無寄處
銚前時展畫圖看

燭龍飛度不容鞭
老去流光倍倏然
壁上題詩如昨日

驚看已是十年前

蚪枝矮樹足娑娑若比龜堂不啻過最愛朝來歌枕看
筆牀琴薦落花多

雪後過右闕

鳳闕門西水滿渠古壇松柏一千株
褰帷路入瓊瑤圃
摩詰新成雪霽圖

方壺二首

方壺事隔海雲東刺有人間鶴髮翁
芒屨任沾蘭蕙露

蒲帆徐漾芰荷風
穿雲一礪來天上
照水千峰落鏡中
穩閉桃源溪口路
莫將漁子姓名通

曳杖行歌野水濱
耕雲亭草綠初勻
花開恰似新來客
松老真如古逸民
栩栩蝶猶迷宿露
翩翩鶴亦動香塵
佗時畫取田家樂
一幅河陽未足真

寄荅范彪西同年

射策同時對

紫宸高賢白首卧
松筠等身書卷師
前哲畢世邱園養

老親天為吾儕留碩果人知斯道有傳薪鴻編靜讀梅
花下畀我仁風四座春

春晚

堂堂春色到將離寂寂情懷付竹枝庭有草花歸燕識
門無俗客落花知常疎冠櫛迴翔地閒弄琴書卧起時
昨日江鄉傳好語又言農事滿東菑

辛巳春日之豐臺二首

今朝無事探芳叢細雨初晴草露融出郭心情偏覺好

籃輿十里綠陰中

一庭風露浩無邊
紅紫相偎萬朶妍
賴有烏衣王謝宅
藥欄偷看已三年

四月清和二首

四月清和藥圃開
門稀剝啄長莓苔
京華作意營幽事
廊廟無端置散材
匣底頻搜兒札看
擔頭多市野花栽
故園兄弟俱衰老
棠棣陰中首重回

溪畔田塍結小廬
此身無計狎樵漁
風光苦憶三三徑

問訊惟憑六六魚竹綠生香迷別圃桃紅飛片過前渠
人間剩有垂雲汎猶恐公麟畫不如

寄亭治具游宛平相公怡園

勝日園林愛探尋多君載酒復攜琴憑臨傑閣嵐光滿
偃息高齋樹色深花檻新添芳砌外泉聲舊落古藤陰
不辭夕照歸偏晚邱壑由來本素心

三月望後遊天壇各道院二首

古壇雲氣外沙路一停車求日閒人酒春風博士家深

林多野色荒圃有穠華紫綺留人久狂歌待日斜
憑高營小閣指顧百花叢老樹迎人入春城滿望中綠
槐鋪輦路翠柏隱齋宮頓覺塵襟滌翩然鶴背同

南榮

中庭蔭高槐垂簾復深窈蘭開滿坐隅清芬徹昏曉公
事喜多暇退食日方蚤輿馬各休憩門庭跡如埽午睡
卻炎曦輕衣御纖縞紅紫點青叢未覺庭軒小靜坐撫
鳴琴清音自繚繞有時淪佳茗宮觀名泉好一啜復再

啜悠然散懷抱西隣新月上晚涼月彌皎妻子坐南榮
歸鴉亂林杪兒亦生白鬚笑語悅翁媪塵慮都棄損天
真可長葆

夜起移蘭入檐下避雨二首

薄暮移蘭出短楹為承沆瀣露華清香消寶鴨雞初唱
愁聽芭蕉葉上聲

閒庭幽事惜花難著意殷勤為探看莫訝老夫中夜起
恐教風雨損紅蘭

辛巳六月廿一日寄亭聲山招遊祖家園觀荷避

暑

樹深溪轉

帝城隈疎豁偏宜避暑來
車馬早衝微雨過茶瓜坐待
夕陽回綠楊煙重雙塘合
紅藕花繁十畝開零落昔年
游賞地波光猶繞舊池臺

板橋村落靜無譁
蘚濕泥融一道斜
芳草含情迎舊雨
古藤為客放新花
樹邊酒榼遊人跡
陌上瓜塍老圃家

賓從壺觴多逸興圖成詩就總堪誇

抱膝

廊廡經行迳堂坳抱膝宜枝頭紅點綴簾外綠參差
蔽簾堆千卷間花接四時清吟耽陸子猶足比東籬

菊

綠覆叢叢花萬枝含烟帶露滿東籬曾經暑雨當春夏
不負三秋漫爛時

題澤州陳先生午亭山圖

澤州先生午亭住託心遠在烟霞間雲耶山耶太行麓
岡巒盤互水潺湲展卷置身入巘谷縱觀適意投烟鬟
中有長松冒層嶺桃花歷落滿春山先生世宅幾何年
疊岫奇巒紫翠殷築城翼翼倚山麓有亭有閣同飛攀
千樹罩廬林影直一川滿地苔花斑傍對浮屠列輪相
門臨古道接間關婦子耕耘雅可樂桑麻雞犬不須刪
此是先生遊釣處一水一石常往還思山容易令人老
莫將林壑凋朱顏茲山茲圖宜常有雲樹茫茫非等閒

寄語山中舊猿鶴留君且與澤人窠

引退偶吟五首

三十餘年侍從臣
慚無文藻荅楓宸
忽聞當宁傳溫語
慚殺冰銜感激人

三徑初開舊宅邊
一庭芳樹簇寒烟
老翁莫道歸來晚
已種梅花十五年

拜疏新陳引退詞

九重宣詔出丹墀
五更不寐聆

天語恰似南宮放榜時

風吹衣領雪翩翩拜

命南歸喜自然萬首鴻編須記取乞歸猶及放翁年

放翁

以六十五
歲乞休

小庭風月喜無邊芳序纔過驚蟄天寄語梅花須晚放
君恩留與度寒年

得請

衰年脫屣遠紛埃願就空山養不才少聽隣雞深夜起

閒看曙色紙窗來經營溫室將迎雪檢點寒花欲放梅
亭看黃河水泮日晴沙新柳暎烟開

將歸

松葉青青草放芽山童相報客還家繞過驚蟄無多日
猶有殘梅晚著花

十二月初二日梅放數枝卻憶歸塗所見

地鑪朝夕暎如春梅萼纔舒便可人幾樹寒香開蚤艷
一年花事逗芳辰櫻紅杏白村村有柳眼桃腮處處新

從此溪山無限好
芒屨端許蹋香塵

寄溪上小園

聖恩垂老許抽簪
便可移家住碧岑
久置田園新入眼
舊栽松竹漸成林
龐公妻子同禪說
鄭谷烟霞識素心
寄語壺觴風月道
常留清景助清吟

老梅作花

寒梅斂未舒
老幹色偏腴
合浦波初暎
融融一串珠

置我

萬斛車塵盡日忙
拂衣揮袂汗如漿
天公作意君知否
置我金鰲玉蜺傍

題景峰皆山園圖二首

高梧雙影落空庭
中有幽人醉復醒
拄笏翠巘丹壑裏
一樓收得萬峰青

山繞花村水抱廬
豐年正是刈禾初
先公家世兼農士
鉅艾聲中聽讀書

壬午正月廿六日行有期矣

三千里外客還家
文杏霏烟柳簇芽
傳語清溪南北岸
好教鶯語喚桃花

二月十七日宿沙河蚤起烟景清曠

烟開麥浪綠初生
露滴茅根雞未鳴
惟有橋邊東畔柳
麴黃顏色曉寒輕

廿二日渡黃河

戲馬臺前春草生
驅車路入古彭城
謾言故國天涯遠
人到江南第一程

杏花

翠陌烟濃蹋淺沙
主人蕭散正還家
莫將春色輕相負
斜倚肩輿插杏花

小園詩

小園近居宅經營自屢歲
我來謝煩囂春風適修禊
池水既渟泓庭樹亦幽翳
牡丹燦天葩海棠簇繁麗
時序入丹榴紅英點階砌
濃陰垂四幄翠色侵人袂
穿林雙白鶴花間發清淚
叩門無雜賓歡言昆與弟
翔步或高

吟投枕得小憩四體任舒閒萬累埽塵滯盈盈清淺波
幽曠渺無際優哉復游哉是吾終老計

山中觀農夫雨中力田之苦

黃梅節近苦滂沱正是山中力作多雨濕短蓑泥沒骨
農人猶聽插田歌

賦得負杖閱巖耕

空林淹積雨扶杖偶閒遊莎濕看眠犢泥深聽叱牛樹
喧歸鳥集山霽晚烟收自適巖居趣何妨信宿留

陰雨竟日小溪不能渡

翠靄空山雨霽初河泥深濶往來疎小兒夜課無鐙火
乞得松肪自照書

北園荷花初開

青蔥一林竹淪漪半畝蓮人生但得此亦足遂幽偏自
予來北墅萬竹森如椽翠幄光照地鳳羽影參天獨惜
池水深荷葉空田田白華三五朶照水亦娟娟山泉苦
沙礫希見藕如船我幸山澤人茲福不能兼乃知造物

意取子惡求全且耽千畝趣看取數枝妍

小園陰雨決句

經旬積雨長蒹葭澤國居然水一涯屋角數叢湘浦竹
堂圍四座嶺南花近人鴈鶩何嫌鬧索果兒童不厭譁
檢點經箱消睡物故人猶有碧山茶

小圃

小圃長廊雨最宜繞花臨水路逶迤祇因地與隣園近
泛取青萍綠滿池

蘭初開

歸來菽秋蘭盈盈滿盆盎日夕勞顧視寒暄慎所向幸
逢積雨後翠色喜無恙朝來簇百箭英氣日騰上時方
夏至初清芬日舒鬯藉以媚長晝聊可佐閒曠

蘭開日間居

積雨連宵未肯晴小池風定水痕生奚童亦解人深意
報取蘭開滿一莖

鶴

花間相喚便相從老僕真成放鶴翁
餉爾魚蝦應久識
每當平旦起開籠

黃菊有于六月中開花者

榴火初開爛似霞如何籬落見黃花
紫英翠蓋三秋色
霜菊先開六月華

幽蘭盛開至數百箭

碧梧黃鳥翠庭空中有幽蘭數十叢
坐愛清芬耽靜對
為君一月住城中

小庭蘭蕙滿

小庭蘭蕙滿帶露白紛紛暑退清風至香從靜裏聞素
波寒越女修竹怨湘君自愜谷中賞忘情嶺上雲

經旬未入

山

避暑三首

避暑幽人戶自扃日長午睡覺初醒閒中樂事君知否
新摘蓮房插滿餅

午陰初過轉庭柯散髮披襟奈暑何識得物情予亦樂

閒看鳬鴈浴清波

經營五畝愛吾廬不用招呼客伴子野老胸中大有事
剪蘭澆菊數芙渠

夏日

濃陰高樹蚤啼鴉唼喋遊鱗戲淺沙魚鳥頗忘城市客
蕭疎稱是野人家種蓮初長新開葉翦蕙猶看二番花
日暮湛華亭上望紫薇映水似晴霞

入山

路入龍眠石徑西
松屏竹隴令人迷
臨流細數新荷葉
恰聽黃鶯自在啼

五畝園長夏

園林歸卧莫嫌遲
綠暗紅稀避暑時
啼樹鳥知無俗響
傍人鶴亦有奇姿
牆陰路轉幽蘭谷
橋畔花園錦石池
老我得分優暇日
臨風搔首歎恩私

溪中謀具小艇

清波曲折數鮮鱗
兩岸芙蓉夾去津
計日放舟溪水上

不妨天際有真人

長廊落成二首

逶迤路轉小池東
荷引清波柳受風
避客莫嫌三徑淺
竹深遙入蕙蘭叢

日長風定柳絲斜
靜聽蟬吟細啜茶
隔岸魚翻紅浪出
一川風落紫薇花

幽栖

小營別業遂幽栖
避暑追涼自杖藜
庭草茜紅新雨後

樹陰潤綠小池西
唵喁影動看魚躍
剝啄聲稀任鳥啼
老我獨閒誰可伴
不須人渡落花溪

五畝園池種荷至秋始發

秋荷作葉滿方池
恰似田田貼水時
我構小軒臨水看
願開數朶照漣漪

出西郭視田禾

西疇來往任婆娑
一徑籃輿野色多
社飲相呼知歲樂
篝車滿路識時和
灌秧雨足支餘溜
穫稻田空荻晚禾

自是為農家世勤此身終合老囁阿

盆蘭先後作花恰滿五十日

隼几湘簾映綠筠小窗風細淨纖塵瓊枝玉蕊隨時發
飽飫蘭香恰五旬

種柳成陰當秋益密三首

昔年種樹傍堤斜欲借青陰隔市譁最愛牆東看不厭
綠楊陰壓紫薇花

水畔微涼拂柳絲小池波動雨來時絺衣團扇無人識

一片閒情碧水知

嫩色鵝黃染麴塵可憐濯濯幾枝新
關情最是吟秋柳
一種輕盈更可人

余所居陽和坊可比白傅履道里

履道南坊構一廛近居池館亦脩然
葛衣紈扇容吾嬾
柳暗花濃喜地偏
鶴正眠時驚鵲起
魚無人處蹴波圓
幾回斷續蟬聲裏
長日真堪似小年

桂花始開

秋林一何曠耳目寄寥廓黃葉落樹杪桂香初破萼辛
無剝啄聲隔簾見白鶴林動知鳥歸波喧見魚躍塵慮
一以寡鄙性耽寂莫俯觀天壤間信無逾茲樂

溪中小艇成二首

新從碧澗泛舟迴衣履猶沾石上苔睡起悠閒無一事
滿庭香露桂花開

山色蒼涼水碧澄芙蓉小艇喜初登奚童亦解移蘭櫂
蕩漾中流剝紫菱

桂花十數株中置一石臺

日暮倚修廊徘徊桂花側金英燦奇葩氤氲香霧塞貞
幹挺勁姿碧葉淨如拭天地惜秋光畀此好顏色余亦
淡蕩人清懼澹無極

初涼

正是初涼落葉天絺衣新卸薄裝絛三秋桂雨蘭香裏
盡日無人手一編

入山泛舟

嶺頭楓葉已微丹，纔有芙蓉照碧灘。
我正扁舟溪上住，不妨薄酒耐初寒。

題小舟

一溪含淺碧，棹影入寒山。
礪石丹青合，雲蘿紫翠殷。
心同秋水淨，夢與白鷗閒。
盡日烟波裏，無人覺往還。

詣勝山看芙蓉因憶聽翁

昔共仙翁舊隱淪，名山歲月老松筠。
亭基猶是當年地，折取芙蓉憶故人。

銓下閱鴈湖聽雪集有作即贈鴈湖

我讀唐人詩錢郎愛清婉風流起後人高唱領詞苑渭
川竹千箇湘渚蘭九畹冰雪淨聰明氣格卑近輓一卷
花間讀悠然令人遠

日暮看溪上芙蓉

夕陽泛溪水晚色上芙蓉倩女臨粧鏡烟鬟倚暮松江
湖秋色好娟淨若為容為爾關情久淹留待晚鐘

勺園招遊社壇

河流曲曲繞深松
繡嶺雕崖一萬重
八十老翁猶壯健
深秋攜我一扶筇

夕歸

路凍無行跡
樵歸老衲從
陰雲迷石磴
積雪耀寒松
沙白連平瀨
天青顯衆峰
言旋時已暮
烟際起昏鐘

文端集卷三十五